

保定府志

第二十四冊 卷五十九卷六十
理學 文苑

保定府志卷五十九

列傳十三

理學

元

劉因字夢吉保定容城人世為儒家五世祖琮生敦武校尉臨
 洮府錄事判官昉昉生奉議大夫中山府錄事僕僕生秉善金
 貞祐中南徙其弟國寶登興定進士第終奉直大夫樞密院經
 厯秉善生述述因之父也述傳見文苑因生之夕述夢神人馬載一
 兒至其家既覺而生乃名曰駟字夢驥後改今名及字因天資
 絕人六歲能詩七歲能屬文落筆驚人甫弱冠才器超邁日閱
 方冊思得如古人者友之作希聖解國子司業硯彌堅教授真
 定因從之游初為經學究訓詁疏釋之說輒嘆曰聖人精義殆

不止此及得周程張邵朱呂之書一見能發其微曰我固謂當有是也及評其學之所長而曰邵至大也周至精也程至正也朱子極其大盡其精而貫之以正也其高見遠識率類此因蚤喪父事繼母孝有父祖喪未葬投書先友翰林待制楊恕憐而助之性不苟合不妄交接家雖貧非其義一介不取弟子造其門者隨材器教之皆有成就公卿過保定者眾聞因名往往來謁遜避不與見或以爲傲弗恤也愛諸葛孔明靜以修身之語表所居曰靜修博果密薦於朝至元十九年徵擢承德郎右贊善大夫初裕宗建學東宮命贊善王恂教近侍子弟恂卒命因繼之未幾以母疾辭歸明年丁內艱二十八年詔復爲集賢學士嘉議大夫固辭且上書宰相書上朝廷不強致帝歎曰古所謂不召之臣其斯人之徒歟三十年夏四月十有六日卒年四

十五無子聞者嗟悼延祐中贈翰林學士資善大夫護軍追封
容城郡公謚文靖歐陽元嘗贊因畫像曰微點之狂而有沂上
風雩之樂資由之勇而無北鄙鼓瑟之聲於裕皇之仁而見不
可留之四皓以世祖之略而遇不能致之兩生烏乎麒麟鳳凰
固宇內之不常有者也然而一鳴而六典作一出而春秋成則
其志不欲遺世而獨往也明矣亦將從周公孔子之後爲往聖
繼絕學爲來世開太平者邪論者以爲知言著有四書精要三
十卷詩五卷號丁亥集又有文集十餘卷及小學四書語錄皆
門生故友所錄惟易繫辭說乃因病中親筆云元史
劉仲祥字燾齋安肅人不樂仕進著書自娛與劉因友善因嘗
稱其性理深邃能爲專門之學雍正通志

按安肅縣城南有
劉祥店卽其故里

苟宗道字正甫元史類編保定人弱冠從郝經使宋被留儀真經授

以學遂以儒名家仕至國子祭酒詩文書畫皆有晉唐風致明一

統志

元郝經都司苟正甫詩接屋連墻受學初斲斲頭角氣凌
虛捋鬚便敢刺雙虎回首還看總一猪未齧子卿壇上雪
且傳黃霸獄中書天教三士
從重耳返國尊王儘有餘

明

劉汝器唐縣人歲貢生官慶王傅好周張程朱之學著有河洲

集及鄉彥家訓唐縣志

陳瓚博野人正統戊辰歲貢澹於仕進重葺二程子祠朔望展
拜跪讀遺書於側身體力行至老不倦最後進以學先儒為干

古傳人鄉黨皆宗仰之博野縣志

國朝

孫奇逢字啟泰號鍾元容城人祖臣明嘉靖辛酉貢生由沐陽知縣官河東鹽運司運判以廉著父不振明諸生子四人奇儒奇遇奇逢奇彥皆砥礪名行爲人所稱奇逢年十四入邑庠謁同里楊繼盛子尙賢尙寶猝然問假在圍城內無糧芻外絕救援將若之何對曰効死勿去尙寶歎曰吾定子生平矣年十七中萬曆三十八年舉人與定興鹿善繼爲友以聖賢相期勉不爲口耳章句之學相與講習討論取諸儒同異而發明考證之中有自信人卽辨駁不顧也

魏裔介孫夏峯傳

二十二歲丁父艱哀毀

致病喪葬一準古禮偕兄若弟結廬墓側不飲酒食肉者三年繼丁母艱既葬倚廬六載如一日提學道李蕃以純孝疏旌其門家固貧日食常不繼邑中富室有願以金粟貸者及邑長欲以事屬奇逢關白一言者奇逢皆婉辭力卻每至絕糧輒割郭

外田易粟一日與善繼講學自辰至日昃始得豆麵作羹怡然無不足之色自言從憂患困鬱中默識心性木原生平得力實

在此

劉易孫夏峯傳

桐城左光斗重之奇逢固湛深好書然爲人清心

忌惡能厲風節所至多與其賢豪長者遊嘗以吳縣周順昌嘉善魏大中桐城左光斗爲時之三君八駿一見定昆季交大學士孫承宗視師關門善繼參其軍事命駕訪善繼輒投刺謁侯承宗慨慷言當世事天啟乙丙間逆奄魏忠賢竊柄大興鈞黨獄左周魏皆逮捕下詔獄奇逢與善繼父正及新城張果中各出身營救且納橐餽焉光斗弟光明大中子學伊順昌友朱友文往來京師經容城必主奇逢家獄久不解奇逢上書承宗承宗具疏請入朝將見帝奏釋之忠賢懼遶御牀泣謂承宗入有清君側之事請帝下詔止其行治獄益急光斗大中順昌各坐

賊至萬奇逢與正竭家貲代償不給則置櫃一口於門大書其上曰爲提學左御史釀金還贓之櫃諸生聞而麇至一日得數千金光斗大中順昌卒相繼拷死奇逢復散其金立盡或謂奇逢不畏閹黨聞乎奇逢歎曰人固當有死爲三君死死不恨且死生有命閹其如我何文獻徵存錄海內高其義有范陽三烈士之稱謂奇逢與鹿正張果中也奉聖夫人客氏弟光先以時焰傾結士大夫欲奇逢座上不可得介所知餽名辭以貧不足具芻菱再請致養馬之需則曰病不能騎乘卒辭之崇禎三年御史黃宗昌薦奇逢與善繼可大任請行徵聘奇逢力辭朝野重之稱曰徵君八年禮科給事王正志舉奇逢不赴歲丙子兵逼容城帥鄉里禦之時秋霖土堞傾圯西北隅尤甚奇逢獨領西北隨禦隨築移時城成鄰邑俱陷獨容城屹然若金湯巡撫都御

史張其平刑部員外郎胡向化俱上其事奉旨加級擢用南兵

部尙書范景文以軍務聘俱辭不赴十一年率子弟門人隱易

州五公山族黨依之者愈眾奇逢飭武備輯人心爲守禦計暇

則講禮典誦詩讀書修冠婚喪祭之儀遠邇服其德化龔翰孫夏峯傳

久之徙新安縣奇逢旣以破亂其家崎嶇兵間有所感激乃與

善繼高弟杜越論學由是不爲危言覈論文獻徵存錄亂定後入輝

縣蘇門水部郎馬光裕贈夏峯田廬闢兼山堂讀易其中率子

孫躬耕自給自公卿逮布素歡然以誠信相接聆其緒論無不

信聖賢之可爲四方從遊者數十百人魏裔介孫夏峯傳登封耿介上

蔡張沐江陵漆士昌范陽耿極清苑高鑄皆稱高業魏一鰲自

山右至起雪亭於夏峯奇逢嘗遊其上故及門問答一鰲爲多

睢州湯斌以監司乞養歸授徒梁宋間後及事奇逢洛學編輯

於此時也穎川劉吏部體仁有雋才見奇逢若有所失求築室
夏峯以居久之不樂棄一琴於堂而去因名留琴堂順治初祭
酒薛所蘊薦奇逢稱爲許衡吳澄請長成奇逢固辭累徵終不
起嘗曰吾坐兼山堂讀易消遣世慮有清泉嘉樹足以資嘯咏
有良朋諍友標理談義足以和性情舍此至長安事貴人乎其
不知止足之義矣安福李震生見奇逢出曰先生今隱矣而少
時豪俠之氣尙自逼人先生非隱者也奇逢語其弟子曰吾生
平尙友凡三變乙丑丙寅之際則慕陳太邱癸甲之間則管幼
安田子春今耄矣其惟衛武公平乎識者以爲定論爲學先倫常
日用而驗察乎天理言心卽在事見言已卽在人見言高遠卽
在卑邇見而歸於慎獨而已

文獻徵
存錄

嘗自謂七十歲工夫較六

十密八十工夫較七十密九十工夫較八十密學無止境此念

無時敢懈此心庶幾少明視聽言動無非禮子臣弟友能盡分
 戒欺求慊是聖賢真境界也其天性孝友兄弟逝久每觸其手
 蹟輒涕零父母忌辰慘容素食九十歲後猶孺慕如少年生平
 尤篤友誼故人子孫饑寒不能自存者惻然推解無倦色而成
 人之美完人之節力持風化蓋終身以之

魏裔介孫
夏峯傳

著有讀易

大旨尙書近指四書近指四禮酌理學宗傳聖學錄兩大案錄

乙丙紀事孫文正公年譜畿輔人物考中州人物考孝友堂家

規歲寒居文集荅問日譜數十卷

文獻徵
存錄

奇逢之學盛於北與

李容黃宗羲鼎足

國史
儒林傳

康熙十四年乙卯四月二十一日卒

於夏峯年九十二前數日不能粒食整衣危坐與門人子孫講

論不輟有考終錄載記甚詳歿後貧窶無不奔走哭弔門人干

餘里皆服心喪治葬事葬於夏峯東原

魏裔介孫
夏峯傳

河南北學者

歲時奉祀百泉書院中州學者就故宅為雙峯書院而容城與元劉因明楊繼盛同祀保定與孫承宗鹿善繼同祀天下無知與不知皆稱曰夏峯先生

方苞孫夏峯傳

道光八年

詔從

祀孔廟子六立雅博雅最有名

先正事略

杜越字君異號紫峯定興人其先小興州人明永樂間內徙定

興縣之東江村越明諸生

王餘佑杜紫峯墓誌

少從定興鹿善繼游平生

以砥礪行詣講明道學為事

四庫全書提要

乙丙間璫焰灼天下偵

卒如蝟有異議者輒行羅織范陽尤逼璫耳目魏左被逮越毅

然曰恥不與黨古誼豈遂絕乎奈何令千載笑人寂寂乃偕鹿

正孫奇逢倡同志醵金納贖不少避時魏大中子學伊周順昌

友人朱祖文俱匿江村越周旋複壁間無稍顧忌鼎革後隱居

不仕家貧布衣蔬食授徒自給一時名彥咸師事之

李富孫與鶴徵錄

人處油然和易終身無疾言怒色而剛介絕俗有壁立萬仞之概遷居新安新安人化之老穉婦孺親如父兄年八十餘飲啖不衰或問以養生之術曰無之但平生未嘗嗔怒或以此得老壽耳

王士正
居易錄

康熙十八年

詔舉博學鴻詞有以越名薦者越歎曰名誣我堅辭之

王餘佑杜
紫峯墓誌

直巡撫命以騾車過越門掖之登山西以檻車載傅山同就道至京師杜寓門謝客比試越告老山告病

詔昇人伏而不謁遂

免試

命出越遣子郊問山曰何日行山曰即日行及歸

特旨授中書皆不拜人比之嚴光周黨云

恕谷
後集

年八十七卒門人私

謚曰文定先生初越以治安為己任及明亡絕口不談時政有

銓曹范箕生者最其出越辭曰但願得侍老母天年足矣餘非
敢望也母歿年踰六十哀毀如少壯時三年齋居不茹葷嘗思
母病當七月求一柔滑席煖體未得每心痛之後盛暑未嘗臥
簟其學不立門戶每舉羅念菴答何善山蔣道休兩書教人而
大本在孝弟得力在分晰義利平生嚴取與卽門弟子一紈爲
壽亦必拒之不受也將歿友人候之問有情無情及病苦之說
越曰人本有情必使之忘是絕情也此二氏矯人語聖賢寧以
人等木石耶我無非自得時卽病而主宰常清無他苦也其定
靜如此墓誌著有紫峯集十四卷子郊廩生畿輔詩傳

王餘佑字申之一字介祺新城人本姓宓贅於王氏遂因王姓
生而英敏善讀書年十六補博士弟子員桐城左忠毅公視學
畿輔覽其文奇之隨繼父建善任臨邑條列時弊數千言上之

拂當事意調建善令魯山時流寇充斥餘佑見時不可爲乃勸之歸未幾遭本生父延善喪痛不欲生又念繼父缺侍養乃奉二親廬於易州五公山之雙峰村躬耕犂确給甘旨暇則述作不入城市者垂三十年故世稱五公山人云當鹿善繼倡道江村餘佑年尙少從之游自魯山歸師事孫奇逢益闡性命學後過范陽又受學於杜越其學以明體達用爲宗閑邪存誠爲要原本忠孝敦尙氣節凡古今成敗治忽事機得失以至一名一物一藝一術無不留心究析生平慷慨好施予縮食節衣無弗於友朋是力及交游餽遺介然不屑受却金之節世咸重之晚年主講獻陵書院爲生徒講解經史剖抉性理每以躬行實踐不愧影衾教人士習翕然丕變人士爭挽留之遂家焉所著有

居諸編乾坤大略諸葛陣圖通鑑獨觀諸書

雍正通志參魏坤五公山人傳

按檔冊王餘佑於光緒元年
入祀新城獻縣兩處鄉賢

崔蔚林字夏章安州人幼精敏絕人七歲時聽父與客講經義
卽從旁默識客或忘其語蔚林以所識告之客大驚異順治丁
酉舉於鄉明年成進士改庶吉士尋授翰林院檢討遷宏文院
侍講復遷侍讀學士時年甫三十人以為旦暮且大用蔚林曰
吾年始壯同年中莫吾先者吾何以堪之驟進非吾志也姑歸
務吾學耳遂以省親乞假過新安商所學於杜越往復辨難越
以猛勇深細稱之歸里後定省之暇研究諸經尤邃於易衣冠
危坐沈思者三年每言周子太極圖動而生陽靜而生陰一動
一靜互為其根此際尤少漸生漸長之義因自為一圖覺有心
得及讀瞿塘來易適相符合曰此所謂先得我心遂焚之策蹇
從孫奇逢於蘇門留兼山堂十餘日致書於其友曰此登嘯臺

遊邵窩觀梅弄竹想見春風舞雪之致不知天壤間更有何樂
可以易此丁繼母艱服闋補翰林院侍講學士轉侍讀學士內
黃知縣上蔡張沐以闡事入都蔚林造訪之一見欣相得語人
曰自吾見仲誠俗情頓割凡事自己可作張主身外之榮辱利
鈍聽之而已仲誠沐字也未幾聞父疾假歸父疾尋愈蔚林遭
疾久未差語人曰疾不可驟遣惟從事寡過之學則卻病方也
日閉戶齋居究心性命之旨時過庭而質所疑焉居五載疾漸
瘳父促赴都仍補侍講學士

胡具慶
崔公傳

一日侍起居

聖祖

問所學命錄以進明日齋沐書致知格物以獻

上命

講格致之義不襲前儒成說

上曰

然則朱陸之說非歟對曰臣非敢以朱陸爲非但十年來體認
所見如此故不敢苟同也